

佛说坚固女经

隋三藏法师那连提耶舍 译



南無本師釋迦牟尼佛

说 明

本简体校正版《佛说坚固女经》电子书，根据《乾隆大藏经》大乘单译经，第 0251 部，隋三藏法师那连提耶舍译《佛说坚固女经》原藏雕板印刷影印本校正，句读仅供参考。特此说明。

仁慧草堂

二〇一七年十一月

● 起诵仪

香赞

(一编)

炉香乍爇. 法界蒙熏. 诸佛海会悉遥闻. 随处结祥云. 诚意方殷. 诸佛现全身.

南無香云盖菩萨摩诃萨 (合掌三称)

南無本师释迦牟尼佛 (合掌三称)

开经偈

(一编)

无上甚深微妙法 百千万劫难遭遇
我今见闻得受持 愿解如来真实义

佛说坚固女经

隋三藏法师那连提耶舍 译

如是我闻：一时，佛在都娑罗国，舍婆提城，祇树给孤独园。

尔时，佛告诸比丘：“汝今谛听，当为汝说。有女人欲发阿耨多罗三藐三菩提心者，先当作如是念：‘一切女人所有谄曲、嫉妬、贪瞋、邪伪一切恶事，以发阿耨多罗三藐三菩提心因缘故，于未来世更不复生。’以是义故，诸女人等，必定须发阿耨多罗三藐三菩提心。”

佛说是语时，众中有一优婆夷名曰坚固，即从座起，整理衣服，合十指掌，而白佛言：“世尊！我今为欲利益一切众生故，为欲施一切众生安乐故，为欲怜愍一切世界众生故，为欲度脱一切天人故，发阿耨多罗三藐三菩提心。世尊！我于过去无始生死，未来无际流转，不生怖畏，但为不断佛种故，不断如来种故，不断一切智种故，发阿耨多罗三藐三菩提心，修菩萨行。世尊！我今为欲安隐一切众生故，发菩提心，无救护者为作救护故，无亲友者为作亲友故，无归依者为作归依故，无舍宅者为作舍宅故。”

是时，长老舍利弗在大众中作如是念：“此坚固妹为与一切众生作亲友故，发阿耨多罗三藐三菩提心，以是发心因缘故，世间则有声闻、辟支佛。”作是念已，即告女言：“妹，汝以发菩提心故，于未来世得见声闻、辟支佛。”

是时，坚固女白舍利弗言：“我从昔来，流转生死，未曾得发如是菩提之心，今始得发，我今获大善利，善得人身，善得寿命。于过去世遇善知识，未曾一念发声闻、辟支佛心，以是因缘，今复能为一切众生发阿耨多罗三藐三菩提心。”

尔时，舍利弗告坚固女言：“汝今善得利益，善得人身，善得寿命，乃能发阿耨多罗三藐三菩提心，如汝所说，应如说行。”

时，坚固女即白大德舍利弗言：“如我所说，我必定修行。”

尔时，舍利弗复问坚固女言：“云何菩萨如说修行？”

女言：“舍利弗，菩萨不乐声闻地，不乐辟支佛地，但乐如来身、如来地、一切智地。如是，大德舍利弗，是名菩萨摩訶萨如说修行。复次，大德舍利弗，菩萨摩訶萨若布施时，愿得阿耨多罗三藐三菩提，不求声闻、辟支佛地；若持戒、

若忍辱、若精进、若禅定、若修智慧时，愿求阿耨多罗三藐三菩提，不求声闻、辟支佛地，是名菩萨摩訶萨如说修行。”

舍利弗语坚固女言：“如说修行者，得何利益？当为我说。”

时，坚固女闻此语已，白舍利弗言：“何者是利，汝欲得见？”

舍利弗言：“妹，欲见发阿耨多罗三藐三菩提心利益。”

女言：“彼心相如幻，云何见有利益？”

舍利弗言：“若汝有智慧者，即于此身，能尽苦，得阿罗汉。若汝此身不能尽苦得阿罗汉者，汝之智慧即为大错。”

女言：“大德舍利弗，若我此身得阿罗汉者，我之智慧即是颠倒，以我此身不取阿罗汉故，于当来世得阿耨多罗三藐三菩提，是故，当知我之智慧不名颠倒。”

时，舍利弗语坚固女言：“汝经几时，当得阿耨多罗三藐三菩提？”

女言：“大德舍利弗，我非佛、非阿罗汉，不知几时当得阿耨多罗三藐三菩提，如舍利弗今得阿罗汉无漏智慧，应知我几时当得阿耨多罗三

藐三菩提。”

舍利弗言：“我无智慧，不知汝几时当得阿耨多罗三藐三菩提。”

女言：“我愿生生世世不用如舍利弗智慧，从他而解，从他生信。我愿得如来、应、正遍知智慧，自知自觉。”

尔时，富楼那弥多罗尼子作是念：“我等住小乘地，得小智慧，若见如来智，乃知我等所得智慧，最为狭劣，住小地小智慧。”

尔时，大德舍利弗心念：“我等虽得阿罗汉果，不能广利益众生，为大丈夫事。惟有大丈夫，具丈夫法者，能多利益无量众生，如坚固女，为自利益及利益一切众生故，发阿耨多罗三藐三菩提心。”作是念已，即问女言：“阿耨多罗三藐三菩提者，名为何法？”

坚固女言：“大德舍利弗，阿耨多罗三藐三菩提者，一切法中最上、最胜，更无过者，是名阿耨多罗三藐三菩提。复次，舍利弗，所言阿耨多罗三藐三菩提者，我不见彼法为阿耨多罗三藐三菩提。”

舍利弗言：“若不见有法名阿耨多罗三藐三菩提者，汝云何发菩提心欲觉菩提？”

女言：“欲令行邪道众生住正道故，我发阿耨多罗三藐三菩提心。”

舍利弗闻此语已，又问女言：“佛得阿耨多罗三藐三菩提时，不见法，不见道，不见果。汝见何利益，欲觉菩提？”

女闻是已，语舍利弗言：“如是，我得阿耨多罗三藐三菩提时，国土中所有弟子，如舍利弗、目犍连等，见此事故，我欲觉无上菩提。”

舍利弗言：“妹，不可得法中，云何欲觉？”

女言：“如是，如是。舍利弗，我正欲觉此不可得法。不可得法，非得非不得故。以是故，我欲觉阿耨多罗三藐三菩提。觉阿耨多罗三藐三菩提已，转大法轮，转法轮时，令三千大千世界众生普得闻知。”

尔时，舍利弗问坚固妹言：“我云何知汝当来得阿耨多罗三藐三菩提？转大法轮时，其声遍满三千大千世界？”

时，坚固女即以右足大指按地，应时三千大千世界地大震动，惟舍利弗所坐之处其地不动。

时，舍利弗作是念：“今此女人作大神通，乃能令此三千大千世界地皆震动，何故惟我坐处其地不动？为是佛力？为是我力？”

尔时，世尊知舍利弗心生念已，告舍利弗言：“于此地中，乃往过去，有千女人同号坚固，皆于汝所坐处发阿耨多罗三藐三菩提心，现大神通，受菩提记。于未来世弥勒出时，亦于此处，有千女人同号坚固，发阿耨多罗三藐三菩提心，现大神力，受菩提记，当得作佛，号胜坚固如来、应、正遍知。”

时，坚固女白佛言：“世尊！若佛菩提非过去得，非现在得，非未来得者，云何世尊说有过去、现在、未来三世诸佛？”

佛言：“如是，如是。佛非过去得，非现在得，非未来得。所以说有过去、未来、现在诸佛者，此但假名，说有三世，非谓诸佛有去、来、今。”

尔时，坚固女白佛言：“世尊！以此法自觉自知，不从他闻因缘故，须发阿耨多罗三藐三菩提心。”

佛言：“善哉！善哉！能如是知，未来当得阿耨多罗三藐三菩提。”

女言：“世尊！无有见如是法不得菩提者，是故我今必定当得阿耨多罗三藐三菩提。”

佛言：“妹，汝未来世教化众生耶？”

女言：“世尊！无有见如是法不教化者，是故，我今必定当能教化众生。”

佛言：“汝于来世作大导师耶？”

女言：“世尊！无有见如是法不作导师，是故，我今必定当得作大导师。”

尔时，天帝释持曼陀罗华，于佛前立，以所持华与坚固女，作如是言：“汝持此华，以散佛上。”

时，坚固女受此华已，以散佛上，以佛神力住于虚空。

尔时，世尊即便微笑，诸佛法尔若微笑时，青、黄、赤、白、紫玻瓈色种种杂光，从口中出，其光遍照至于梵天，还至佛所，绕佛三匝，还从顶入。

尔时，阿难白佛言：“世尊！诸佛非以无事及小因缘而便微笑，何因缘故，如是微笑？”

佛告阿难：“汝见此坚固女不？是女于此命终，舍女人身，得成男子，于星宿劫中，得阿耨多罗三藐三菩提，号曰普见如来，应供、正遍知。其普见佛初会说法，有二十百千万亿人得尽诸漏，弃舍重担，证阿罗汉；第二说法，有一十五百千万亿人得阿罗汉；第三说法，有一十百千万亿人

得阿罗汉；从是已后，无量百千万亿那由他众得阿罗汉果。如是，阿难，彼普见如来刹土之中，无有地狱、饿鬼、畜生，其国众生悉皆成就十善业道，不修商贾农作，其佛国土有无量功德。是故，若有善男子、善女人，发阿耨多罗三藐三菩提心者，于彼人所，不应起轻慢心，唯有如来明知此事，非余声闻、辟支佛等所能了知。是故，阿难，若有爱乐我者，尊重我者，不应于菩萨所，生轻慢心。”

佛说此法已，长老阿难、大德舍利弗、坚固优婆夷，及一切天、人等，闻佛说法，皆大欢喜。

《佛说坚固女经》卷终

● 结诵仪

补阙真言

(三编)

南無喝啰怛那. 哆啰夜耶. 佉啰佉啰. 俱住俱住. 摩啰摩啰. 虎啰. 吽. 贺贺. 苏怛那. 吽. 泼抹拏. 娑婆诃.

三皈依

(一编)

自皈依佛, 当愿众生, 体解大道, 发无上心;
自皈依法, 当愿众生, 深入经藏, 智慧如海; 自
皈依僧, 当愿众生, 统理大众, 一切无碍, 和南
圣众。

南無佛 南無法 南無僧 (合掌三称)

南無一切如来、应、正等觉 (合掌三称)

南無本师释迦牟尼佛 (合掌三称)

回向偈

(一遍)

诵经功德殊胜行 无边胜福皆回向
 普愿沉溺诸有情 速往无量光佛刹
 十方三世一切佛 一切菩萨摩诃萨
 摩诃般若波罗蜜

回向偈

(一遍)

愿以此功德 庄严佛净土
 上报四重恩 下济三途苦
 若有见闻者 悉发菩提心
 尽此一报身 同生极乐国



此咒置经书中可灭误跨之罪

南无护法韦驮尊天菩萨

